



Adresseinformasjon fylles inn ved ekspedering.
Se mottakerliste nedenfor.

Dato: 13.09.2018
Vår ref: 16/01611-15
Deres ref:

Tildeling av driftskonsesjon etter minerallova for Grotnes i Kviteseid kommune. Tiltakshavar: Jan Geir Gravir

Leiv Erikssons vei 39
Postboks 3021 Lade
N-7441 Trondheim

TELEFON + 47 73 90 46 00

E-POST mail@dirmin.no

WEB www.dirmin.no

GIRO 7694.05.05883

SWIFT DNBANOKK

IBAN NO5376940505883

ORG.NR. NO 974 760 282

SVALBARDKONTOR

TELEFON +47 79 02 12 92

Direktoratet for mineralforvaltning med Bergmeisteren for Svalbard (DMF) viser til søknad om driftskonsesjon datert 15.10.2017 frå Jan Geir Gravir med org. nr. 877 534 642.

1. Tildeling av driftskonsesjon

Jan Geir Gravir med org. nr. 877 534 642, heretter kalla «Tiltakshavar» eller «Tiltakshavaren», får med dette driftskonsesjon etter minerallova § 43.

Tiltakshavaren får driftskonsesjon for uttak av mineralske ressursar i Grotnes på del av eigedomen gnr./bnr. 20/6 i Kviteseid kommune. Mineralførekomsten høyrer til kategorien mineral som grunneigaren eig.

Konsesjonsområdet har eit areal på kring 18 daa og går fram av vedlegg 1.

I arealdelen av kommuneplanen er delar av området øyremerkt til råstoffutvinning, og delar av området øyremerkt til LNF-område. Kommunen er i gang med å utarbeide ny arealdel til kommuneplanen for perioden 2018-29

DMF gjer merksam på at ein driftskonsesjon gjeve i medhald av minerallova ikkje erstattar krav om løyve, godkjenning, arealplan eller konsesjon etter annan lovgjeving. Tiltakshavar er ansvarleg for å innhente andre nødvendige løyve.

2. Vilkår for driftskonsesjonen

2.1. Driftsplan

Drifta skal til ei kvar tid gå føre seg i samsvar med ein driftsplan godkjend av DMF.

Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.



DMF kan krevje ny oppmåling og at ajourførte kart og profiler skal sendast inn når DMF finn det nødvendig.

2.2. Økonomisk sikkerheit

Tiltakshavaren blir pålagd å stille økonomisk sikkerheit med NOK 230 000, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 150 000, og deretter årlege avsetjingar til ein bankkonto som det skal etablerast pant i til fordel for DMF slik at Tiltakshavaren ikkje kan råde over kontoen på noko vis, begge deler som skildra i punkt 5.11.

Innan 2 månader etter datoen på dette konsesjonsvedtaket skal Tiltakshavaren ha:

- (i) inngått ein avtale om finansiell sikkerheit med DMF, sjå vedlegg 2.
- (ii) lagt fram påkravsgaranti frå bank som DMF vurderer som tilfredsstillande, sjå vedlegg 3
- (iii) etablert pantet til fordel for DMF, jf. pantelova §§ 4-4 til 4-6, sjå vedlegg 4.

2.3. Bergteknisk ansvarleg

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

2.4. Anna vilkår

Konsesjongrensa for massetaket skal setjast ut eller markerast i terrenget, slik at den er lett synleg gjennom heile driftsperioden.

3. Godkjenning av driftsplan

DMF godkjenner driftsplanen for Grotnes grustak. Den godkjende versjonen av driftsplanen ligg ved dette konsesjonsvedtaket.

4. Høyringsfråsegner med kommentarar frå DMF

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Kviteseid kommune, Telemark fylkeskommune, Statens vegvesen Region sør, NVE Region sør og andre rørte partar.

Høyringsperioden var frå 27.06.2018 til 14.08.2018.

DMF har motteke høyringsfråsegn frå Statens vegvesen, Kviteseid kommune og Telemark fylkeskommune.

Frå høyringsfråsegnene har DMF særleg merkt seg dette:

Statens vegvesen

Ein attgjeving av vesentlege delar av Statens vegvesen sitt høyringsfråsegn:



«Dersom dette blir ein regulerings sak må det stillast krav om at det lagast ein skikkeleg avkøyring til området med lineføringar og siktliner i tråd med handbøkene N100 Veg- og gateutforming og V121 Geometrisk utforming av veg- og gatekryss. Det må også stillast rekkefølgekrav til opparbeiding av avkøyringa.

Dersom dette ikke blir ein regulerings sak må det søkjast om løyve til avkøyring/utvida bruk av avkøyring. Da vil tilsvarande krav til avkøyring bli eit vilkår for godkjenning.»

DMF sin kommentar

DMF gjer Tiltakshavar merksam på Statens vegvesen sitt høyringsfråsegn kva angår krav om søknad om løyve til avkøyring/utvida bruk av avkøyring. Ut over dette tar DMF høyringsfråsegna til etterretning.

Kviteseid kommune

Ein attgjeving av vesentlege delar av Kviteseid kommune sitt høyringsfråsegn:

«Det er rett som søkar skriv, at kommuneplanen ikkje viser rett posisjon for flata som er avsett som G5 (Grjotnes) til reguleringsføremål råstoffutvinning. Posisjonsfeilen, som er gjennom-gåande for fleire av dei regulerte arealføremåla, er her ca. 85 m i x-koordinaten og ca. 30 m i y-koordinaten. Kommunen er i gang med å utarbeide ny arealdel til kommuneplanen for perioden 2018-29. Feilen vil då bli retta opp.

Det er derimot ikkje rett at det her ligg føre godkjent reguleringsplan for området. Kommunens syn, og som vil kome fram i den nye kommuneplanen, er at det for eksisterande massetak der det har vore meir eller mindre kontinuerleg drift over mange år, ikkje vil bli sett krav om detaljreguleringsplan for å kunne fortsetje. Arealbruken vil vere avklara gjennom kommune-planens arealdel med tilhøyrande føresegner. Den vesentlegaste grunngevinga for dette er at ein reguleringsplanprosess neppe tilfører forvaltningsmyndighetene nye opplysingar av særleg verdi, jf. at tilhøve til omgjevnaden, naboar etc, og påverknaden på miljøet i stor grad alt er kjent, til skilnad frå ein oppstart i nytt område.

Avgrensinga av arealføremålet råstoffutvinning for området Grjotnes, som nå vil bli gjort på nytt i kommuneplanen, vil bli yttergrensa for lovleg uttak utan detaljreguleringsplan. Det er uklart kva søkar meiner med kommentaren i kartvedlegga om at "mål er ikke riktige". I kommuneplanen vil det uansett bli lagt inn ei avgrensing som mogleggjer dei tre skisserte uttaksetappene.

Utover at tiltaket får konsekvensar i sjølve uttaksområdet, er ikkje kommunen kjent med at tiltaket har eller vil få særlege negative verknader for miljøet, irekna naturmangfaldet, forureining eller kulturminne. Kommunen legg til grunn at konsesjonsbehandlinga hjå direktoratet på tilstrekkeleg vis sikrar at uttaket får ei miljømessig forsvarleg avslutting, og har ikkje forslag på avbøtande tiltak utover det.»

DMF sin kommentar

DMF tar kommunens høyringsfråsegn til etterretning.



Telemark fylkeskommune

Ein attgjeving av vesentlege delar av Telemark fylkeskommune sitt høyringsfråsegn:

«Omsyn til automatisk freda kulturminne

Vi kjenner ikkje til automatisk freda kulturminne som kjem i konflikt med søknaden. Vi vurderer det også som lite sannsynleg at ikkje kjende, automatisk freda kulturminne er bevara i konsesjonsområdet, og har difor ingen merknader til søknaden.

Vi vil likevel gjere merksam på meldeplikta etter kulturminnelova § 8 andre ledd. Meldeplikta oppstår når det blir oppdaga automatisk freda kulturminne som ikkje var kjent på førehand. Føresegna legg ei klart ansvar på tiltakshavar om å følgje stanse- og meldeplikta. Tiltakshavar skal forsikre seg om at dei som utfører arbeidet på staden er kjent med stanse- og meldeplikta, men det er tiltakshavar sjølv som står ansvarleg for at freda kulturminne ikkje blir skada. Telemark fylkeskommune er rette adressat for ei eventuell melding. Om det blir påvist automatisk freda kulturminne er det Riksantikvaren som avgjer om arbeidet kan fortsetje og vilkåra for det.

Vi rår at til meldeplikta innarbeidast i vilkåra for konsesjonen, og at følgjande tekst vert brukt:

Om det viser seg først medan arbeidet er i gang at det kan virke inn på eit automatisk freda kulturminne, skal Telemark fylkeskommune kontaktast og arbeidet stansast i den utstrekkinga det kan røre kulturminnet. Kulturminnemyndigheitene avgjer snarast mogleg – og seinst innan 3 veker – om arbeidet kan fortsetje og vilkåra for det. Fristen kan forlengast når særlege grunnar tilseier det (jf. kulturminneloven § 8 andre ledd).»

DMF sin kommentar

DMF finner det ikkje hensiktsmessig at meldeplikta ved funn av automatisk freda kulturminne setjast som eit eiga vilkår for konsesjonen, da dette allereie følgjar av kulturminneloven § 8 jf. § 3. DMF føreset at Tiltakshavar driver i samband med anna regelverk, her under kulturminneloven.

Ut over dette tar DMF Telemark fylkeskommune sitt høyringsfråsegn til etterretning.

5. Korleis DMF vurderer søknaden om driftskonsesjon

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekomstar på meir enn 10 000 m³ masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønsmessig prøving før det blir avgjort om det skal gjevast driftskonsesjon. I vurderinga av om det skal gjevast driftskonsesjon skal det leggjast vekt på om søkjaren er "skikka" til å utvinne førekomsten. Dette inneber at ein skal leggjast vekt på om prosjektet ser ut til å vere økonomisk gjennomførbart, om det



blir lagt opp til bergfagleg forsvarleg drift, og om søkjaren har tilstrekkeleg kompetanse til å drive førekomsten. I vurderinga av om det skal gjevast driftskonsesjon skal det òg leggjast vekt på omsyna som er nemnde i minerallova § 2.

DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevast konsesjon.

DMF har vurdert konsesjonssøknaden slik:

5.1. Utvinningsrett

Mineralførekomsten som skal utvinnast tilhøyrar kategorien mineral som grunneigaren eig. Tiltakshavaren er sjølv grunneigar for konsesjonsområdet. Etter grunnboka er Tiltakshavaren heimelshavar til eigedommen der konsesjonsområdet ligg. Etter DMF si vurdering har Tiltakshavaren utvinningsrett til førekomsten.

5.2. Arealmessig status for tiltaket

Konsesjonsområdet har eit areal på kring 18 daa og går fram av kart i vedlegg 1.

I arealdelen av kommuneplanen er delar av området øyremerkt til råstoffutvinning, og delar av området øyremerkt til LNF-område. Kommunen er i gang med å utarbeide ny arealdel til kommuneplanen for perioden 2018-29.

5.3. Økonomien i prosjektet

DMF har vurdert Tiltakshavar si næringsoppgåve for dei siste to åra før søknadstidspunktet. DMF har vidare gjort ei vurdering av bedriftas noverande økonomiske tilhøve. På grunnlag av opplysningane som er gjevne vurderer DMF bedrifta som økonomisk skikka.

5.4. Driftsplan

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

Framlegget til driftsplan omfattar heile driftsperioden og avsluttinga av grustaket. Skildringa og kart- og snitteikningar presenterer det planlagde uttaket av førekomsten innanfor arealet på 18 dekar. Det totale volumet grusreservar som skal takast ut ned til botnkoten på nivå 82 moh er estimert til kring 300 000 m³. Det årlege uttaket vil variere med marknaden, men det planlagde uttaket per år er 100 – 20 000 m³. Det er planlagt drift med oppstart i nordvest og drift i heile bredda mot søraust. Utdrivne område som ikkje trengst i den vidare drifta, skal setjast i stand fortløpande. I tillegg til driftsfasane er det lagt fram ein plan for sikring og avslutting av grustaket.

Etter DMF si vurdering kan den vedlagde versjonen av driftsplan for Grotnes godkjennast. Ein finn at planen tilfredstillar dei krava som DMF stiller til driftsplanar, og etter DMF si vurdering legg planen opp til bergfagleg forsvarleg drift.



Dersom det under drifta oppstår nye situasjonar eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehand.

Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

5.5. Bergfagleg forsvarleg drift

Kravet om at drifta til ei kvar tid skal gå føre seg på ein bergfagleg forsvarleg måte inneber at aktiviteten må vere i samsvar med tilfredsstillande faglege standardar for denne typen verksemd.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.

5.6. Søkjaren sin kompetanse for drift av førekomsten

I vurderinga av om søkjaren har tilstrekkeleg kompetanse er det den totale kompetansen som søkjaren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.

Tiltakshavaren har i søknaden gjeve opp Jan Geir Gravir som bergteknisk ansvarleg for uttaket. Personen er registrert hos DMF som bergteknisk ansvarleg for uttaket og oppfyller kvalifikasjonskrava i forskrifta.

Etter DMF si vurdering har Tiltakshavaren tilstrekkeleg kompetanse til å drive førekomsten.

5.7. Dei miljømessige konsekvensane av utvinning

I vurderinga av om det skal gjevast driftskonsesjon skal det leggast vekt på omsynet til miljøet og kulturminne.

Det finst ingen reguleringsplan for uttaket.

Biologisk mangfald – vurdering etter naturmangfaldlova

Naturmangfaldlova § 7 pålegg alle offentlege instansar som tek avgjerder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Høyringsfråsegner og eigne søk i Naturbase og Artskart (gjennomførte den 11.05.2018) er lagde til grunn for vurderingane etter naturmangfaldlova i DMF si handsaming av søknaden. DMF reknar kunnskapsgrunnlaget etter naturmangfaldlova § 8 for å vere tilstrekkeleg til at det kan fattast vedtak i saka. Føre-var-prinsippet i naturmangfaldlova § 9 gjeld såleis ikkje.

Oppsummering av kunnskapsgrunnlaget:



Det er ikkje gjort nokon funn ved søk i artskart eller naturbase.

Etter DMF si vurdering vil slikt uttak av massar som det er søkt om ikkje vere i konflikt med forvaltningsmålet for naturtypar og økosystem som er fastsett i naturmangfaldlova § 4 eller forvaltningsmålet for artar i naturmangfaldlova § 5.

Naturmangfaldlova § 10

Etter naturmangfaldlova § 10 skal den samla belastinga på økosystem og naturmangfaldet i regionen vurderast. Uttaksområdet er omkransa av skog, fjell, veg og vatn. DMF vurderer at arealbeslaget i stor grad allereie er gjort i forbindelse med tidlegare aktivitet. Massetaket fører til anleggsaktivitet så lenge uttaket er i drift. Veger og skogbruk vert vurdert til å bidra til en samlande belastninga.

Konsekvensar av tiltaket for kulturminner

DMF har ved søk i naturbase ikkje gjort funn av freda kulturminna i konsesjonsområdet. DMF minner likevel om den generelle varslingsplikta etter kulturminnelova § 8 til kulturminnemyndighetene, fylkeskommunen.

DMF sin konklusjon

DMF har kome til at det ikkje finst avgjerande moment som talar mot å innvilge konsesjon.

5.8. Tilhøvet til omgjevnadene og dei nærliggjande områda under drift

Mineralressursane skal forvalast og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr.

Tiltakshavar opplyser at sikringsgjerde brukast på toppen av uttaksskråninga og flyttast innover under drifta. Ut mot vegen sikrast det med gjerde eller voll. Skråningane har naturleg rasvinkel under uttak og blir fortlaupande tatt ned til 1:1,5 ved avslutning. Bratte skråningar merkast.

DMF har kome til at dette ikkje er avgjerande moment som talar mot å innvilge konsesjon.

5.9. Kva tiltaket vil ha å seie for verdiskaping og næringsutvikling

Førekosten det er søkt om driftskonsesjon for fell inn under råstoffgrupperinga sand, grus, pukk og leire (byggjeråstoff). Råstoffet blir brukt i produkt som det moderne samfunnet er heilt avhengig av og som blir brukte i bygg, vegar og anlegg.

Ifølgje tiltakshavar siktes/knusas lausmassane til salgbare fraksjoner og seljast i det lokale marknaden som sand, natursingel og kult.

5.10. Langsiktig planlegging for etterbruk eller tilbakeføring av området

Tiltakshavar opplyser at ved enda drift blir oppryddinga å køyre vekk ferdigsorterte og salgbare masser. Skråningane skal ikkje vere for bratte med tanke på ras og utsjåande. Skråningsvinkel ca 1:1.5. Deretter så området til med gressfrø eller liknande i heile skråninga slik at uttaksområdet blir ein naturleg del av omgjevnadane.



Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

5.11. Økonomisk sikkerheit

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelege krava til sikkerheit.

Tiltakshavar har ikkje kome med noko framlegg til økonomisk sikkerheit.

5.11.1. Pålegg om å stille økonomisk sikkerheit og vurdering av kor stor sikkerheita skal vere

Etter DMF si vurdering er Tiltakshavaren sitt framlegg til kor stor sikkerheita skal vere ikkje tilfredsstillande. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 230 000 for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på sine egne erfaringstal for tilsvarande uttak, med tillegg for eksterne og uventa kostnader.

5.11.2. Form for sikkerheit

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.

Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.

Bankgaranti–oppstartsfasen

DMF vurderer det som nødvendig at Tiltakshavaren, innan 2 månader etter datoen då konsesjonsvedtaket blei gjort, stiller ein bankgaranti som DMF vurderer som tilfredsstillande som påkravsgaranti for eit beløp på NOK 150 000. Dette er nødvendig for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre nødvendige sikrings- og oppryddingstiltak som DMF godtek;
- (ii) Ved konkurs, opphøyr eller anna avvikling av Tiltakshavaren si verksemd; og
- (iii) Dersom konsesjonen blir trekt attende.



Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldande etter bankgarantien, utan omsyn til motsegner frå Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 150 000. Når beløpet på bankkontoen har nådd NOK 150 000, eller tidlegare etter skriftleg samtykkje frå DMF, fell plikta til bankgaranti bort.

Individuell avsetjing, avsetjingsperiode og storleiken på avsetjinga

Deretter skal Tiltakshavaren setje inn midlar på bankkontoen årleg fram til totalbeløpet på NOK 230 000 er nådd. Dei årlege innskota blir rekna ut etterskotsvis på grunnlag av masseuttaket året før. Det skal betalast inn NOK 5,75 årleg per tonn utteken masse.

Ved fastsetjinga av satsen per tonn utteken masse har DMF lagt til grunn at fondet skal byggjast opp over ein periode på 20 år, det vil seie NOK 11 500 per år. I søknaden er det rekna med eit uttak på i snitt 1 000 m³, tilsvarende om lag 2 000 tonn/år, noko som gjev ei årleg avsetjing på NOK 5,75 per tonn.

Innbetalinga for masseuttaket må vere avsett innan 1. februar året etter.

5.11.3. Rapportering og dokumentasjon

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivast kontoen.

I tillegg finn DMF det nødvendig at Tiltakshavaren undervegs i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette driftsperioden for uttaket blir endra eller det skjer andre vesentlege endringar i driftsplanen, skal DMF informerast umiddelbart. Elles skal tiltakshavaren kvart femte år gjere ei ny vurdering av om sikkerheita er tilstrekkeleg. Når vurderinga er gjord, skal tiltakshavaren utarbeide ein rapport og sende den til DMF utan grunnlaust opphald.

DMF kan òg ha behov for meir rapportering og dokumentering enn det som er skildra over, og finn det difor nødvendig å påleggje Tiltakshavaren plikter i så måte i konsesjonsvilkåra.

5.11.4. Justering av sikkerheita

Etter forskrift til minerallova § 2-3 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå Tiltakshavaren, og tidspunktet for innbetaling. Slike endringar kan òg gjerast når som helst ved endringar i minerallova og andre relevante lover, forskrifter og vedtak.

6. Kor lenge driftskonsesjonen gjeld

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell òg bort dersom:

- utvinningsretten for statens mineral blir sletta



- avtalen om rett til å utnytte førekomst av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikkje overdragast. Det gjeld òg ved overdraging av utvinningsretten.

7. Plikter for Tiltakshavaren

Tiltakshavaren har rettar og plikter som følgjer av minerallova med forskrifter.

Meldeplikt ved oppstart og stans av drift

Seinast éi veke før oppstart av drifta skal Tiltakshavaren sende melding til DMF. Tiltakshavaren skal òg sende melding til DMF før drifta mellombels blir stansa eller lagd ned i medhald av minerallova § 44.

Drifta skal utførast med varsemd

Drifta skal utførast med varsemd, slik at skadane ikkje blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.

Forsvarleg sikring og opprydding

Området skal sikrast slik at arbeidet ikkje medfører fare for menneske, husdyr eller tamrein. Etter minerallova § 49 omfattar sikringsplikta òg gruveopningar, tippar og utlagde massar på område som er knytte til konsesjonsområdet.

Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

Ansaret til bergteknisk ansvarleg

Bergteknisk ansvarleg har eit særskilt ansvar for å sjå til

- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekomsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

Rapportering

Tiltakshavaren skal sende årleg driftsrapport til DMF via «Min side» på dirmin.no.

Når uttak av grunneigars mineral blir lagt ned, kan DMF stille krav om å sende inn sluttrapport, måledata og prøvemateriale. Dette gjeld dersom uttaket har mineraliseringar av vesentleg geologisk interesse.

8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.



Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikkje finn grunn til å gjere om vedtaket, sendervi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringar. Etter forvaltingslova § 18 og 19 har partane i saka rett til å sjå saksdokumenta.

Med helsing

Maria Lauritzen
seksjonsleiar

Odd-Arne Eidsmo
rådgjevar

Dokumentet er elektronisk signert og har difor ikkje handskrivne signaturar.
Sakshandsamar: Odd-Arne Eidsmo

Vedlegg:

KONSEJONSOMRÅDE FOR GROTNES I KVITeseID KOMMUNE.pdf
AVTALE OM FINANSIELL SIKKERHETSSTILLELSE.docx
PÅKRAVSGARANTI.docx
PANTSETTELSESERKLÆRING FOR ENKLE PENGEKRAV.docx
GODKJENT DRIFTSPLAN FOR GROTNES I KVITeseID KOMMUNE.pdf

Motta karar:

Jan Geir Gravir Fjågesundvegen 1128 A 3850 KVITeseID
(enkeltpersonforetak)

Kopi til:

Bjørn Gjærum	Kløvervegen 1	3830 ULEFOSS
Anna G. Kjartansdottir	Kløvervegen 1	3830 ULEFOSS
Anne Grete Gravir Kildal	Klosterhagen 45	3732 SKIEN
Fredrik Nygård Simonsen	Hama ngs kogen 29	1338 SANDVIKA
Kvite seid kommune	Kvite seidgata 13	3850 KVITeseID
Te lemark fylkeskommune	Postboks 2844	3702 SKIEN
Fylkesmannen i Te lemark	Postboks 2603	3702 SKIEN
Sta tens vegvesen Region sør	Postboks 723 Stoa	4808 ARENDAL
Norges vassdrags- og energidirektorat Region sør	Postboks 2124	3103 TØNSBERG